



Nuuk, 24. juli 2012

Inatsisartut Suleriaasianni § 37 naapertorlugu Naalakkersuisunut imaattunik apeqqute-qarpunga:

Apeqqutit:

1. 2011 upernaakkut ataatsimiinnermi aalajangiiffigisassatut siunnersuuteqareernerma kingorna (UPA 2011/40) 2011-imi ukiakkut ataatsimiinnermi isumaliutissiissut imatut qulequtalik Inatsisartunit akuersissutigineqarpoq:

"Iluni kikkunnit tamanit iserfigineqarsinnaasuni imaluunniit annertunerusumik sulisoqarfiutigisuni pisortat sanaartortitsinerini iluarsaassinikkullu suliaqarnerini (pisortat sanaartortitaat) sanaartornissamut aningaasaliissutit tamakkerlutik 25 mio. kr-inik qaffasinnerusunilluunniit nalillit minnerpaamik 1 %-iinik sanaartukkat sila-taatigut iluatigullu kusassarneqarnissaannut atugassanik Naalakkersuisut immikkoortitsisaqqullugit peqquneqarnissaat pillugu Inatsisartut aalajangiiffigisassaattut siunnersuut (UKA 2011/21)."

Aalajangiiffigisassatut siunnersuut qulaani issuarneqartoq piviusunngortin-niarnera Naalakkersuisunit qanoq iliuuseqarfigineqarpa?

2. Inatsisartut Suleriaasiat § 33, imm. 5 naapertorlugu Inatsisartut aalajangiiffigisassaattut siunnersuut Inatsisartunit akuersissutigineqarpat Inatsisartut inatsisissaattut siunnersuuterpiatut saqqummiunneqarnermigut imaluunniit nalunaa-rutinngorlugu atuutilersinneqarnermigut piaartumik atuutilersinniarnissaa Naalakkersuisut pisussaaffigissavaat.

Pisussaaffitsik qulaani pineqartoq naammassiniarlugu Naalakkersuisut qanoq iliuuseqalersaarpat?

3. **UKA 2011/21-imi Inatsisartut aalajangersaanerat qaqugu Naalakkersuisunit timitalerneqarluni piviusunngortinneqarsinnaanera naatsorsuutigineqarpa?**

(Inatsisartuni ilaasorta q Jane Petersen, Inuit Ataqatigiit)

Tunngavilersuut:

Inatsisartut aalajangersaareernerisa kingorna arlaleriarlunga eqqumiitsuliortunik saaffigineqartarsimavunga suliap sumut killinneranik apeqqutilliusunit. Taamaattumillu ilisimarusuppara Inatsisartut aalajangiussaata Naalakkersuisunit qanoq iliuuseqarfigineqarsimanersoq, pingaartumillu paaserusuppara inatsisiliornikkut tamanna qanoq aqqissuussaasumik atuut-sinneqassanersoq.